

Inatsisartut aalajangiiffigisassaattut siunnersuut Naalakkersuisut peqquneqarnissaat pillugu sulissutigeqqullugu erngup nukinganik iluaquteqarluni nukissiorfiliornissaq Qasigiannuanut aamma Aasiannut pilersuisussamik, aamma Nuup erngup nukinganik iluaquteqarluni pilersorneqarnerata annertusineqarnissaanik, maleruagassat siunnersuutip aallaqqaataani tunngavilersuutitut nalunaarsorneqartut naapertorlugit aaqqissuunneqartussamik (Immikkoortut A-miit D-mut)

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

Akissuteqaat

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

Aappassaanneerpeqarnera

Naalakkersuisut sinnerlugit, Inatsisartut Sanaartornermut Ataatsimiititaliaa aalajangiiffigisassatut siunnersuutip suliarineqarneranut atatillugu peqqissaartumik sulisimaneranut, qutsavigaara. Naalakkersuisut Qasigiannuani aamma Aasianni erngup nukinganik nukissiorfiliornissap kiisalu Nuummi erngup nukinganik pilersuinerup allilerneqarnissaata sulissutiginnisaanik peqquneqarnissaat, amerlanerussuteqarluartut taperseraat, Naalakkersuisut nuannaarutigalugu maluginiarpaat.

Tamatuma saniatigut Sanaartornermut Ataatsimiititaliami Siumumeersut aamma Demokraatineersut amerlanerussuteqartut siunnersuut ilusimisut iluseqartillugu tapersersoraat, Naalakkersuisut maluginiarpaat.

Inuit Ataqatigiit taamatuttaaq erngup nukinganik nukissiorfiliornissaq tapersermassuk, Naalakkersuisut nuannaarutigaat. Erngup nukinganik nukissiorfiit ataatsikkut suliarineqarnissaat Inuit Ataqatigiit kissaatigigaat, Naalakkersuisut suliassap ingerlaqqinneranut atugassatut, maluginiarpaat.

Naluneqanngitsutut Naalakkersuisut kingusinnerpaamik UKA2020-mi erngup nukinganik nukissiorfiliornissamut, aningaasalersornissaannut, ingerlatsineranut piginnittuunermullu aalajangiiffigisassatut saqqummiussisussaapput.

Suliassat marluk taakkua aningaasaliinertut ataatsimoortutut isigineqassasut, ikummatissanik nunap iluaneersunik pisariaqartitsinermik sapinngisamik annertunerpaamik annikillisisisussaallutik, ataatsimiititaliap isumaqatigigaa, Naalakkersuisut suliap ingerlaqqinnerani eqqumaffigissavaat.

Erngup nukinganut suliassaq nukissiornermut politikikkut suliassaavoq pingaaruteqartorujussuaq. Pisortat ullumikkut nukissiamik pilersuinerisa 70 %-ata missaa nukissiamik ataavartuminngaaneersuuvoq, erngup nukinganik suliassap

atuutsinneqalernerani missiliuisoqarpoq, 2030-imi pisortat pilersuineranni nukissiaq ataavartoq 90 %-it missaannik annertussuseqalersinnaasoq.

Naalackersuisut Nukissiamik Imermillu pilersuineranut Immikkoortumut pilersaarutaanni 2030-imi ajornanngiffiani sumiluunniit nukissiamik mingutsitsinngitsumik atuinissaq pillugu anguniakkat pingaarnerit naammassineqarnissaannut, erngup nukinganik suliassap piviusunngortinneqarnissaa qitiulluinnarpoq, aammalu erngup nukinganik suliassaq aammattaaq FN-imi piujuartitsiviusumik ineriartortitsinissamut nunarsuarmi siunnerfinnut tunngavissiivoq.

Taamatut oqaaseqarlunga, Naalackersuisut siunnersuutaat akuerineqassasoq, Naalackersuisut sinnerlugit inassutigaa.